



Ni Presidente Thomas S. Monson

“Dikanto Panawan wanno Baybay-an”

*Ti Nailangitan nga Amatayo . . . ammona nga agsursuro
ken dumur-as ken pumigpigsatayo no maipasango ken
malasattayo dagiti pannubok a nasken a pagdalanantayo.*

Iti journalko ita a rabii, isuratko, “Daytoy ti maysa kadagiti makaparegta unay a sesion ti ania man a sapasap a komperensia a dinar-ayakon. Naka-pimpintas ken naespirituan unay.”

Kakabsat, innem a bulan ti napa-labasen idi nagkikitatayo iti sapasap a kumperensiatayo, nakaidda idi iti ospital ti nasingpet nga asawak, ni Frances, kalpasan ti nakaro a pannakatnagna sumagmamano nga aldaw kasakbayanna. Idi Mayo, kalpasan ti sumagmamano a lawas a situtued a panangikarigatanna tapno umimbag dagiti sugatna, pimmusay isuna. Nalaus ti pannakaulilak iti ipapanawna. Nagkallaysakami iti Salt Lake Temple idi Oktubre 7, 1948. Inton bigat koma ti maika-65 nga anibersario ti kallaysami. Isu ti ayat ken biagko, ti mapagtalkak, ken kasingedan a gay-yemko. Saan nga umdas a sawek a nangulilaak kenkuana tapno ipeksak ti pudno a riknak.

Daytoy a komperensia ti maika-50 a tawen manipud idi inawagannak

iti Korum dagiti Sangapulo-ket-Dua nga Apostol ni Presidente David O. McKay. Iti unos amin dagitoy a tawen awan sabali a naawatko no saan a ti naan-anay a suporta ti nasingpet a kaingungotko. Nakaad-adu dagiti sakripisio nga inaramidna tapno maipatungpalko ti pagrebbengak. Uray naminsan awan ti nangngegko a reklamo manipud kenkuana uray no masansan a naidawat kaniak a mangbubos iti sumagmamano nga aldaw ken no dadduma sumagmamano pay a lawas nga adayoak kenkuana ken kadagiti annakmi. Maysa isuna a pudno nga anghel.

Kayatko nga ipeksa ti panagyamanko, kasta met kadagiti kapamilyak, gapu iti napalaus a pannakaibukbok ti ayat a simmangbay kadakami manipud pay idi pimmusay ni Frances. Ginasgasut dagiti kard ken surat a naawatmi manipud iti amin a suli ti lubong a mangipekpeksa iti panagdayawda kenkuana ken pannakipagladingitda iti pamilyak.

Nakaawatkami iti nakaad-adu a napipintas a sabsabong. Agyamankami kadagiti nakaad-adu a kontribusion a nairuknoy iti naganna iti General Missionary Fund ti Simbaan. Iti nagan kadakami a pinanawanna, idanonko ti nalaus a panagyamanko para iti naasian ken naimpusuan a panangipakitayo iti kinaimbag.

Kadakkelan a liwliwa kaniak iti daytoy naladingit a panawen ti panagsinami ket ti pammaneknekkko maipapan iti ebanghelio ni Jesucristo ken ti pannakaammok a sibibiag pay laeng ti ay-ayatek a ni Frances. Ammok a saan nga agbayag ti panagsinami. Pinaglantipkami iti balay ti Dios ti maysa nga addaan iti awtoridad a mangilantip iti daga ken iti langit. Ammok nga agdennakaminto manen iti maysa nga aldaw ken dikaminton agsina pay. Daytoy ti pannakaammo a mangpappapigsa kaniak.

Kakabsat, mabalin nga ipapantayo nga awan ti tao a nagbiag a saan a nakapadas iti panagsagaba ken panagladingit, wanno awan ti panawen iti pakasaritaan ti tao a saan a nagtuok wanno nagrigat iti kaano man.

No naulpit ti kapaypay-an ti panagbiagtayo, adda pannulisog nga agdamag iti saludsod nga “Apay a siak?” No dadduma kasla awan patinggana dagiti parikuttayo, kasla awan silaw a manglawag iti sipngget ti rabii. Mariknatayo a napalawlawantayo iti sakit ti nakem ken liday gapu kadagiti napaay nga arapaap ken pannakau-pay gapu iti kinaawan iti namnama. Sangkamaysatayo iti panangipeksa iti araraw iti biblia, “Adda kadi bal-samo idiyay Galaad?”¹ Mariknatayo

a nabaybay-antayon, agsagsagaba, agmaymaysa. Nakaugaliantayon ti mangkita kadagiti bukodtayo a kinadaksanggasat babaen ti negatibo a wagas. Naawanantayon iti panaganus nga agsapul iti solusion kadagiti problematayo, a nalipatantayon a no masansan ket kasapulan ti nailangitan a kababalin ti panaganus.

Dagiti rigat a sagsagabaentayo ket mangisangbay kadatayo iti pudno a pannubok iti kabaellantayo nga agibitur. Kasapulan pay laeng a sungbatan ti tunggal maysa kadatayo ti napateg unay a saludsod: Sumukoak kadin, wenno leppasekto daytoy? Adda dagiti sumuko no makitada a saanen a kabaellan ti bagida ti mangpamek kadagiti pannubokda. Tapno makailepas kasapulantayo ti agibitur agingga iti paggibusan ti biag a mismo.

Bayat ti panangpampanunottayo kadagiti pasamak a mabalin a mapag-teng kadatayo amin, maisaotayo kas ken ni Job idi un-unana, “Mayanak ti tao iti pannakaburibor.”² Ni Job ket maysa a “naan-anay ken nalinteg” a tao a “nagbuteng iti Dios, ken imma-dayo iti dakes.”³ Managkararag ken nabaknang, nasken a maipasango ni Job iti maysa a pannubok a mabalin a mandadael iti asino man. Naibus amin a sanikuana, inuyaw dagiti gagayyemna, nagsagaba iti rigatna, nagladingit unay iti pannakapukaw ti pamiliiana, naguyugoy isuna a “mangilunod iti Dios, ket matay.”⁴ Linabanna daytoy a sulisog ket impeksana manipud iti kaunggan ti natakneng a kararuana:

“Adtoy, ti saksik adda idiy langit, ket isu ti agsungbat kaniak nga adda iti ngato.”⁵

“Ammok a sibibiag ti mannubbotko.”⁶

Nagtalinaed ni Job iti pammatina. Aramidentay met kadi ti kastoy no maipasangotayo kadagita a pannubok iti biagtayo?

No mariknatayo a madagdagse-nantayo kadagiti pannubok ti biag, laglagipentayo koma a linasat met ti kastoy dagiti dadduma, nagibturda, ket kalpasanna narimbawanda.

Ti pakasaritaan ti Simbaan iti daytoy a dispensasion ti pakabuklan dagiti panawen, ket napnuan iti pad-padas dagiti tao a nagrigrigat ngem nagtalinaedda a natibker ken narag-sak gapu ta insentroda ti biagda iti ebanghelio ni Jesucristo. Ti gapuna? Inaramidda ti ebanghelio ni Jesucristo a sentro ti biagda. Daytoy ti mangtu-longto kadatayo nga agibitur iti ania man a padas a sumangbay iti biagtayo. Mapasantayonto latta dagiti narigat a pannubok, ngem kabaellan-tayonto a sanguen ken sarangten dagitoy a situtered, ket agballigitayonto kadagitoy.

Manipud iti ikamen ti sagabaen, manipud iti pungan a nabasa iti lulua, itang-aynatayo iti langit ti nasantuan a pammatalged ken napateg a kari: “Dikanto panawan wenno bay-bay-an.”⁷ Saan a magatadan ti kasta a pannakaliwliwa.

Idi nagbaniagaak iti adu nga adadayo a lugar iti intero a lubong tapno mangipatungpal kadagiti pag-rebbengan ti awagko a kas propeta, naammuak ti adu a banag—agraman ti kinapudno a ti amin ket makapadas iti panagladingit ken panagsagaba. Diak kabaellan a rukoden ti amin a sakit ti nakem ken ladingit a nasaksiak idi binisitak dagiti tao nga agsagsagaba iti leddaang, masaksa-kit, maipaspasango iti diborsio, ken marigatan iti nasukir nga anak a lalaki wenno anak a babai, wenno agsagsagaba kadagiti bunga ti basol. Adu pay dagiti maibagak, gapu ta nakaad-adu dagiti problema a mabalin a dumteng kadatayo. Narigat ti mangibaga iti maysa a pagarigan, ngem no pampapunotek dagiti pannubok, malagipko ni Brother Brems, maysa kadagiti ma-estrok iti Sunday School idi ubingak pay. Isu ket napudno a miembro ti Simbaan, maysa a lalaki nga addaan iti nabalitokan a puso. Addaanda iti asawana, ni Sadie, iti walo nga anak, a dumani amin kadagitoy ti kaedad dagiti ubbing iti pamiliak.

Kalpasan ti panagkallaysami ken ni Frances ket immakarkami manipud iti ward, nakitami da Brother ken Sister

Brems ken dagiti miembro ti pami-liada kadagiti pasken ti kallaysa ken punpon, kasta met kadagiti reunion iti ward.

Idi 1968, pimmusay ti asawa ni Brother Brems, a ni Sadie. Dua pay kadagiti walo nga annakna ti pimmusay kalpasan ti sumagmamano a tawen.

Maysa nga aldaw iti dumani kalpasan ti 13 a tawen, tinawagannak iti telepono ti kabaketan nga apoko a babai ni Brother Brems. Inlaw-lawagna a nadanonen ni lalongna ti maika-105 a panagkasangayna. Kinunana, “Aggigian isuna iti bassit a sentro ti pagaywanan ngem paspas-waren ti sibubukel a pamilia tunggal Domingo, a pangisuruanna iti maysa nga adalen iti ebanghelio.” Intuloyna pay, “Daytoy napalabas a Domingo, impadamag ni Lelong kadakami, ‘Dungngok, matayakton itoy a lawas. Mabalin kadi a tawaganyo ni Tommy Monson. Ammonanton no ania ti aramidenna.’”

Binisitak ni Brother Brems iti sumaruno a rabii. Nabayagen a diak nakita isuna. Diak makasarita isuna, gapu ta tulengen daytoy. Diak makapagsurat tapno basaenna koma, gapu ta bulseken daytoy. Naibaga kaniak a makasarsarita ti pamiliiana kenkuana babaen ti panangiggem iti kanawan a ramayna ket isurat iti palad ti kanigid nga imana ti nagan ti tao a bumisbisita. Ania man a mensahe ket nasken nga ipakaammo kenkuana iti kastoy a wagas. Sinurotko ti kastoy a wagas babaen ti panangiggemko iti ramayna ket inispelingko ti T-O-M-M-Y M-O-N-S-O-N, ti nagan a kanayon nga awagna kaniak idi. Naragsakan ni Brother Brems, ket innalana dagiti imak nga imparabaw iti ulona. Ammok ti tarigagayna nga umawat iti bendision ti priesthood. Kinaduanak ti drayber a nangitulod kaniak iti sentro ti pagaywanan ket imparabawmi dagiti imami iti ulo ni Brother Brems ket intedmi ti tinarigagayanna a pam-mendision. Kalpasanna, nagarubos dagiti lua manipud dagiti bulsek a matana. Iniggamanna iti nairut dagiti

imami nga agyamyaman. Nupay dina nanggeg ti pammendision nga im-paaymi kenkuana, napigsa ti Espiritu, ket mamatiak a naparegta isuna a nangammo a naipaaymi ti bendision a kasapulanna. Saanen a makakita pay daytoy nasingpet a lalaki. Saanen a makanggeg pay. Nakaidda isuna iti aldaw ken rabii iti bassit a siled iti maysa a sentro ti pagaywanan. Iti baet dayta nasagid ti pusok iti isem iti rupana ken dagiti balikas nga insa-ona. “Agyamanak kenka,” kinunana. “Naimbag unay kaniak ti Nailangitan nga Amak.”

Iti uneg dayta a lawas, kas met laeng iti impadles ni Brother Brems, pimmusay isuna. Iti kaano man saanna a pinanunot no ania ti kurang kenkuana; ketdi, kanayon a nalaus unay ti panagyamanna iti adu a paraburna.

Ammo pay ti Nailangitan nga Amatayo, a mangmangted iti nakaad-adu a pagragsakantayo, a masursuruan ken dumur-as ken pumigpigsatayo no maipasango ken malasatantayo dagiti pannubok a nasken a pag-dalananantayo. Ammotayo nga adda dagiti panawen a mapasarantayonto ti makasakit iti nakem a ladingit, no ag-leddaangtayonto, ken no masuottayo no sadino ti pagpatinggaan ti pam-matitayo. Nupay kasta, dagiti kasta a panagrigrigat ket mangipalubos ka-datayo nga agbalbaliw iti nasaysayaat, tapno urnosentayo manen ti biagtayo iti wagas nga insuro ti Nailangitan nga Amatayo, ken agbalintayo a naidumduma ngem iti sigud—nasay-sayaattayo ngem iti sigud, ad-adda a makaawattayo ngem iti sigud, naas-asitayo ngem iti sigud, napigpigsat ti pammaneknektayo ngem iti sigud.

Nasken koma a daytoy ti pang-geptayo—saan laeng nga agan-anus

ken agibtur, wen, no di ketdi pay agbalitanyo a napino iti kinaespiri-tuan kabayatan ti panagbiagtayo iti naragsak ken naliday a panawen. No saan a gapu kadagiti pannubok a sarangten ken problema a risuten, agtalinaedtayo koma a kastoy, bassit unay wenno awan panagdur-astayo nga agturong iti panggeptayo a tun-oyen nga agnanayon a biag. Nangi-peksa ti mannaniw iti kasta met laeng a kapanunotan kadagitoy a balikas:

*Saan nga alisto a dumakkel ti nasayaat a kayo,
No napigpigsat ti angin, napigpigsat ti kayo.
No nangatngato ti tangatang, nangatngato daytoy.
No ad-adu ti bagyo, ad-adda a pumigsa daytoy.
Iti init ken lamiis, iti niebe ken tudo,
Dumakkel ti kinaimbag iti kayo man wenno tao.⁸*

Ti Apo laeng ti makaammo iti kinauneg wenno kinakaro dagiti pannuboktayo, ti saemtayo, ken ti sagabaentayo. Isu laeng ti mangi-diydiaya kadatayo iti agnanayon a talna kadagiti panawen ti panagrigrigat. Isu laeng ti mangsagsagid kadagiti agrigrigat a kararuatayo babaen dagiti makaliwliwa a balikasna:

“Umaykayo kaniak dakayo amin nga agrigrigat ken madagdagsenan, ta paginanaenkayto.

“Alaenyo ti sangolko kadakayo, ket agsursurokayo kaniak; ta siak namemmaak ken napakumbabaak iti panagpuspusok: ket makasarakkayto iti inana a maipaay kadagiti kararuayo.

“Ta ti sangolko nalaka ken n-lag-an ti awitko.”⁹

Kadagiti karagsakan man a kanito

wenno kalidayan a kanito, kaduatayo Isuna. Inkarina a saanto daytoy nga agbalbaliw iti kaano man.

Kakabsatko, sapay koma ta ag-balintayo a napudno iti Nailangitan nga Amatayo a saan nga agbalbaliw iti panaglabas dagiti tawen wenno kadagiti panagrigrigattayo iti biagtayo. Saan a nasken a mapasarantayo dagiti rigrigat tapno malaglagiptayo Isuna, ken saan a nasken a mapilittayo nga agpakumbaba sabbay a mamati ken agtalektayo Kenkuana.

Sapay koma ta kanayon nga ikarkarigatantayo ti mayasideg iti Nailangitan nga Amatayo. Tapno maaramidantayo daytoy, nasken nga agkararagtayo Kenkuana ket dumngge-tayo Kenkuana iti inaldaw. Pudno a kasapulantayo Isuna iti tunggal oras, panawen man ti ragsak wenno rigat dagitoy. Sapay koma ta kanayontayo a laglagipen ti karina: “Dikanto panawan wenno baybay-an.”¹⁰

Addaan iti naan-anay a pigsa ti kararuak, paneknekak a sibibiag ti Dios ken ay-ayatennatayo, a nagbiag ken natay para kadatayo ti Bugbug-tong nga Anakna, a ti ebanghelio ni Jesucristo ti nauneg a pagtaudan ti pigsa ken namnama a makatulong kadatayo nga agibtur iti karigatan a panawen ti biagtayo. Sapay koma ta agbalin a kastoy, ikararagko iti sag-rado a nagan ni Jesucristo, amen.

DAGITI NAGADAWAN

1. Jeremias 8:22.
2. Job 5:7.
3. Job 1:1.
4. Job 2:9.
5. Job 16:19.
6. Job 19:25.
7. Josue 1:5.
8. Douglas Malloch, “Good Timber,” iti Sterling W. Sill, *Making the Most of Yourself* (1971), 23.
9. Mateo 11:28–30.
10. Josue 1:5.

Dagiti Pannursuro para iti Panawentayo

Dagiti adalen iti Melchizedek Priesthood ken Relief Society kadagiti maikapat a Domingo ket maisangratto iti “Dagiti Pannursuro para iti Panawentayo.” Mabalín nga isagana ti tunggal adalen manipud iti maysa wenno ad-adu pay a bitla a naited iti kallabes unay a sapasap a komperensia (kitaen iti tsart iti baba). Mabalín dagiti stake ken district president ti pumili no ania kadagiti bitla ti nasken a mausar, wenno mabalinda nga idutok daytoy a pagrebengan kadagiti bishop wenno branch president. Nasken a unay-unay dagiti dadaulo ti kinapateg dagiti kakabsat iti Melchizedek Priesthood ken kakabsat iti Relief Society a mangad-adal kadagiti isu met la a bitla kadagiti isu met la a Domingo.

Dagiti dumardar-ay kadagiti adalen iti maikapat a Domingo ket maallukoy nga agadal ken mangitugot iti klase ti kaudian nga isyu ti magasin iti sapasap a komperensia.

Dagiti Singasing para iti Panangisagana iti Adalen manipud kadagiti Bitla

Agkararagka tapno kaduaenaka ti Espiritu Santo kabayatan ti panagadal ken panangisurom (kadagiti) bitla. Mabalín a masulisogka

a mangisagana iti adalen nga usarem dagiti dadduma pay a material, ngem dagiti bitla iti komperensia ti naanamongan a kurikulum. Ti naituding nga aramidem ket mangtulong kadagiti dadduma nga agsursuro ken agtungpal iti ebanghelio kas naisuro iti kallabes unay a sapasap a komperensia ti Simbaan.

Subliem nga adalen (dagiti) bitla, a sapulem dagiti pagbatayan ken doktrina a mangipaay kadagiti kasapulan dagiti miembro ti klase. Kasta met a sapulem dagiti estoria, reperensia ti nasantuan a kasuratan, ken palawag manipud (kadagiti) bitla a makatulongto kenka a mangisuro kadagitoy a kinapudno.

Agaramidka iti maysa a balabala [outline] no kasano ti panangisurom kadagitoy a pagbatayan ken doktrina. Ibilangmo ti panangiraman kadagiti saludsod a mangtulong kadagiti miembro ti klase:

- Mangsapul kadagiti pagbatayan ken doktrina [kadagiti] bitla.
- Panunoten ti maipapan iti kaipapananda.
- Mangiburay iti pannakaawat, kadagiti kapanunotan, padpadas, ken pammaneknek.
- Mangyaplikar kadagitoy a pagbatayan ken doktrina iti panagbiagda.

DAGITI BULAN DAGITI ADALEN NGA ISURO	DAGITI MATERIAL NGA ADALEN ITI MAIKAPAT-A-DOMINGO
Oktubre 2013–Abril 2014	Dagiti bitla a naited iti Oktubre 2013 sapasap a komperensia*
Abril 2014–Oktubre 2014	Dagiti bitla a naited iti Abril 2014 sapasap a komperensia*

* Para kadagiti adalen iti maikapat a Domingo iti Abril ken Oktubre, mabalín a mapili (dagiti) bitla manipud kadagiti kallabes a komperensia wenno manipud iti kaudian. Sidadaan a magun-od dagitoy a bitla iti adu a lengguahe iti conference.lds.org.



Ni Presidente Dieter F. Uchtdorf
Maikadua a Mammagbaga iti Umuna a Panguluon

Umaykayo Makikadua Kadakami

Naminsan adda maysa a lalaki a nagtagtagainep nga adda isuna iti maysa a dakkel a pasdek a nagguummongan ti amin a relihion ti lubong. Naammuanna nga adu a banag iti tunggal relihion ti kasla makaay-ayo ken napateg.

Naam-ammona ti nasingpet nga agassawa a mangibagi iti Ti Simbaan ni Jesucristo dagiti Santo iti Ud-udina nga Aldaw ket sinaludsodna, “Ania ti *ipapaaramidyo* kadagiti miembroyo?”

“Awan ti *ipapaaramidmi* kadagiti miembromi,” insungbatda. “Ngem idawat ti *Apo* nga idatonmi ti amin.”

Inlawlawag dagiti agassawa maipapan kadagiti pagrebengan iti Simbaan, ti home teaching ken visiting teaching, dagiti full-time a mision, dagiti linawas a family home evening, aramiden iti templo, welfare ken humanitarian service, ken panangisuro iti klase.

“Baybayadanyo kadi dagiti taoyo iti amin a trabaho nga ar-aramidenda?” sinaludsod ti lalaki.

“Ah, saan,” inlawlawag dagiti agassawa. “Itedda ti panawenda nga awanan bayad.”

“Kasta met nga,” intuloy dagiti agassawa, “tunggal innem a bulan

dumardar-ay wenno agbuybuya dagiti miembro ti Simbaanmi iti sapa sap a kumperensia iti 10 nga oras.”

“Sangapulo nga oras a mangted kadagiti mensahe?” nagsiddaaw ti lalaki.

“Komusta met dagiti linawas a serbisio iti simbaanyo? Kasano ti kaatid-dog dagitoy?”

“Tallo nga oras, tunggal Domingo!”

“Talaga,” kinuna ti lalaki. “Talaga kadi nga ar-aramiden dagiti miembro ti simbaanyo ti amin a kinunayo?”

“Wen ken saan la a dayta. Saanmi pay a nadakamat maipapan ti family history, youth camp, debosional, panagadal iti nasantuan a kasuratan, panagsanay iti panangidaulo, dagiti aktibidad dagiti agtutubo, nasapa a klase iti seminary, panangpatalinaed kadagiti pasdek ti Simbaan, ken siempre adda linteg ti Apo iti salun-at, ti binulan a panagayuno a pangtulong kadagiti napaglaw, ken ti apagkapullo.”

Kinuna ti lalaki, “Ita matiktikawak. Apay a kayat ti asino man ti agpamiembro iti kasta a simbaan?”

Immisem dagiti agassawa ket kinunada, “Impagarupmi a dika agsaludsod.”

Apay a Kayat ti Asino man ti Agpamiembro iti Kasta a Simbaan?”

Iti panawen a bumabassit ti bilang ti adu a simbaan iti intero a lubong, Ti Simbaan ni Jesucristo dagiti Santo iti Ud-udina nga Aldaw—nupay bassit laeng no ikumpara daytoy kadagiti dadduma pay a simbaan—ket maysa kadagiti kapartakan a dumakdakkel a simbaan iti lubong. Manipud pay idi Septiembre 2013 addaanen ti Simbaan iti nasurok a 15 milyon a miembro iti sangalubongan.

Adu dagiti gapu no apay, di la balin a mangtedak iti sumagmamano?

Ti Simbaan ti Mangisalaklan

Umuna, insubli Mismo ni Jesucristo daytoy a Simbaan iti panawentayo. Makitayonto ditoy ti awtoridad nga agtignay iti naganna—tapno mangbuniag para iti pannakaugas dagiti basbasol, tapno mangipaay ti sagut ti Espiritu Santo, ken tapno mangilantip iti daga ken iti langit.¹

Dagiti agkameng iti daytoy a Simbaan ket mangipateg iti Mangisalaklan a Jesucristo ket tarigagayda ti mangsurot Kenkuana. Naragsakda a nakaammo a makisasao manen ti Dios iti sangkatawan. No umawaw-awatda kadagiti sagrado nga ordinansa iti priesthood ken makitululagda iti Dios, mariknada ti bilegna iti biagda.² No sumrekda iti nasantuan a templo, mariknada nga addada iti sibayna. No agbasbasada kadagiti nasantuan a kasuratan³ ken agbibigda kadagiti pannursuro dagiti propetana, ad-adda a mayasidegda iti Mangisalaklan nga ipatpategda unay.

Agbiag iti Pammati

Sabali pay a gapu ket mangmangted ti Simbaan kadagiti gundaway iti panagaramid iti naimbag.

Ti panamati iti Dios ket madaydayaw, ngem saan laeng nga agusto dagiti tao a dumngeg kadagiti makaparegta a mensahe wenno mangarapaap kadagiti parabur a sumangbay.⁴ Kayatda ti agbiag iti pammatida. Kayatda nga isagana ti bagida ket makipaset iti daytoy naindaklan nga aramid.

Ket dayta ti mapasamak no kumapengda kadakami—addaanda iti adu a gundaway a mangusar kadagiti talentoda, pannakipagrikna, ken panawen kadagiti nasasayaat nga aramid. Gapu ta awan dagiti mabayadan wenno matangdanan a pangulo kadagiti kongregasion iti sapisap a lubong, dagiti mismo a miembro ti simbaantayo ti agserserbi para iti aramid. Maawaganda babaen ti inspirasion a naggapu iti langit. No dadduma agboluntariotayo; no dadduma datayo ti “iboluntario.” Ditayo ibilbilang a dagensen dagiti maipapaaramid kadatayo do di ketdi gundaway a mangipatungpal kadagiti katulagan a siraragsak nga aramidentayo tapno makapagserserbi iti Dios ken kadagiti annakna.

Dagiti Napapateg a Parabur

Maikatlo a gapu no apay a kumapeng dagiti tao iti Simbaan ket gapu ta adda dagiti napapateg a parabur ti panagbalin a disipulo.

Ibilangtayo ti panagbuniag a pangrugian ti panagbalin a disipulo. Ti inaldaw a pannagnatayo a kaduatayo ni Jesucristo ket mangiturong iti talna ken panggep itoy a biag ken nalaus a rag-o ken agnanayon a pannakaisalkan iti umay a lubong.

Dagiti napudno a sumurot iti daytoy a dalan ket mailiklikda iti adu a panagbiddut, panagladingit, ken pagbabawyan iti biag.

Dagiti napakumbaba iti espiritu ken napudno iti puso ket makasarakda kadagiti dadakkel a kinabaknang ti pannakaammo ditoy.

Dagiti agsagsagaba wenno agladingit ket makasarakda iti pannakaliwiwa ditoy.

Dagiti madagdagsenan iti basol ket makasarakda iti pannakapakawan,

wayawaya, ken inana.

Kadagiti Pumanaw

Ti panagsapsapul iti kinapudno ket nangidateng iti minilmilion a tattao iti Ti Simbaan ni Jesucristo dagiti Santo iti Ud-udina nga Aldaw. Nupay kasta, adda dagiti pumanaw iti Simbaan a sigud nga impategda.

Mabalin nga adda agsaludsod, “No napintas ti ebanghelio, apay nga adda pumanaw?”

No dadduma ipapantayo a gapu ta adda nakapaguraanda wenno nasadutda wenno managbasolda. Kinapudnona, saan a kasta ti kasimplena. Kinapudnona, saan a maymaysa ti gapu iti agduduma a kasasaad.

Adda dagiti ay-yatentayo a miembro ti nabayagen nga agpampanunot no rumbeng nga umadayoda iti Simbaan wenno saan.

Itoy a Simbaan a mangbigbig unay iti bukod a kinawaya nga agpili, nga insubli ti agtutubo a lalaki a nagdamag kadagiti saludsod ken nagkidaw kadagiti sungbat, dayawenmi dagiti sipupudno nga agsapsapul iti kinapudno. Nasakit ti nakemmi no pumanawda manipud iti Simbaan nga ipatpategmi ken iti kinapudno a nasarakanmi, ngem dayawenmi ti karbenganda nga agrukbab iti Manakabalin a Dios a segun iti diktar ti konsensiyada, a kas met laeng iti panangbigbigmi iti gundawaymi.⁵

Dagiti Saan a Nasungbatan a Saludsod.

Adda dagiti marigatan kadagiti saan a nasungbatan a saludsod maipapan kadagiti banag a napasamak wenno naisao iti napalabas. Sibabatad nga aw-awatentayo nga iti dumani 200 a tawen ti pakasaritaan ti Simbaan—kageddan dagiti agtultuloy a napipintas, madaydayaw, ken nadosan a paspasamak—adda dagiti banag a naisao ken naaramid a a nagsaludsodan dagiti tao.

No dadduma adda dagiti saludsodtayo gapu laeng ta kurangtayo iti impormasion ket kasapulantayo laeng ti aganus pay bassit. No naipakaamon ti naan-anay a kinapudno iti

kamaudianan, dagiti banag a ditayo maawatan idi ket maipaawatto kadatayo.

No dadduma sabasabali ti opinion iti talaga a kaipapanan ti “kinapudno.” Ti saludsod a mangparnuay iti panagduadua dagiti dadduma, kalpasan ti naannad a panagpulutpot, ket mabalin a mangpatibker iti pammati dagiti dadduma.

Dagiti Biddut dagiti Saan a Perpekto a Tao

Ket isaok a sipaprangka daytoy, adda dagiti panawen a makaaramid kadagiti biddut dagiti miembro wenno lider iti Simbaan. Mabalin nga adda dagiti banag a naisao wenno naaramid a saan a maitunos kadagiti kababalin, pagbatayan, wenno doktrinatayo.

Panagkunak perpekto laeng ti Simbaan no imatonan daytoy dagiti perpekto a tattao. Perpekto ti Dios, ken natarnaw ti doktrinana. Ngem agtrabaho Isuna babaen kadatayo—a saan a perpekto nga annakna—ket agaramid iti biddut dagiti saan a perpekto a tao.

Iti panid ti paulo ti Libro ni Mormon mabasatayo, “Ket ita, no adda riro, nagkurangan dagiti tao; gapuna, saanyo nga uyawen dagiti banag ti Dios, tapno masarakankayonto nga awan mulitna iti pangukoman ni Cristo.”⁶

Kastoy a kanayon ti mapaspasamak manipud pay idi ket agtultuloyto daytoy agingga a dumteng ti naan-anay a panawen no agturay Mismo ni Cristo iti rabaw ti daga.

Sayang ta adda dagiti naitublaken gapu kadagiti biddut nga inaramid dagiti tao. Ngem iti baet daytoy, ti agnanayon a kinapudno ti naisubli nga ebanghelio a masarakan iti Ti Simbaan ni Jesucristo dagiti Santo iti Ud-udina nga Aldaw ket saan a mamulitan, mapakapsut, wenno madadael.

Kas maysa nga Apostol ni Apo Jesucristo ken kas maysa a nakasaksi mismo kadagiti konseho ken maararamid iti daytoy a Simbaan, iburayko

ti napudno a pammanekneko nga awan ti napateg a panggeddeng a makaapekto iti Simbaan wenna kadagiti miembrona ti naaramid a saan a sipapasnek a naidawatan iti inspirasion, pannarabay, ken pananganamong ti Agnanayon nga Amatayo. Daytoy ti Simbaan ni Jesucristo. Saanto nga ipalubos ti Dios a sumiasi ti Simbaanna manipud iti naituding a turogenna wenna mapaa a mangipatungpal iti nadiosan a pagtungpalanna.

Adda Lugar Para Kadakayo

Kadagiti nangyadayon iti bagida manipud iti Simbaan, kayatko nga ibaga, ay-ayatek a gagayyemko, nga adda pay laeng lugar ditoy para kadakayo.

Umaykayo ket ibinglayyo dagiti talento, sagut, ken kabaelayo kadakami. Sumingsingpettayo amin gapu iti daytoy.

Mabalin nga adda agsaludsod, “Kasano ngaruden dagiti duaduak?”

Gagangay laeng ti agdamag kadagiti saludsod,—ti bin-i ti napudno a panagsaludsod ket masansan nga agsulbod ken dumakdakel a maitulad iti dakel a kayo ti panna-kaawat. Adda dagiti sumagmamano a miembro ti Simbaan nga, iti ania man a gundaway, ket saanda naaddaan kadagiti napasnek wenna sensitibo a saludsod. Maysa kadagiti panggep ti Simbaan ti mangaywan ken mangtaripato iti bukel ti pammati—uray pay no adda man daytoy iti nadarat a daga ti panagduadua ken awan kinaawan namnama. Ti pammati ket panangnamnama kadagiti banag a saan a makita ngem pudno.⁷

Ngarud, ay-ayatek a kakabsatko—ay-ayatek a gagayyemko—pangngasiyo, unaenyo a pagduaduaan dagiti duaduayo sakbay a pagduaduaanyo ti pammatiyo.⁸ Ditay koma ipalubos a ti panagduadua ti manglapped kadayo ken mangyadayo kadayo manipud iti nadiosan nga ayat, talna, sagsagut a sumangbay babaen ti pammati ken ni Jesucristo.

Mabalin nga adda dagiti agkuna, “Saanak a maibagay kadagiti tao iti Simbaanyo.”

No makitayo koma kadagiti puspusomi, nalabit a makitayonto nga ad-adda pay a maibagaykayo ngem iti panangipagarupyo. Mabalin a masdaawkayo a makakita nga adda dagiti paggagaran ken pagrigatan ken namnamaenmi a maipada kadakayo. Ti nagtaudan wenna nakapadaklanyo ket nalabit a maigiddiat iti makitkitayo kadagiti adu a Santo iti Ud-udina nga Aldaw, ngem mabalin a maysa a parabur dayta. Kakabsat, ay-ayatek a gagayyem, kasapulanmi dagiti naidumduma a talento ken panniriganyo. Ti pagdudumaan dagiti tao ken tattao iti amin a suli ti lubong ket maysa a pigsa daytoy a Simbaan.

Mabalin nga adda agkuna, “Panagkunak diak makapagtungpal kadagiti pagrukodanyo.”

Ad-adda koma a nasken a sumurotkayo kadakami no kasta! Panggep ti Simbaan ti mangtaraon kadagiti addaan pagkurangan, ti marigrigatan, ken nabannog. Napno daytoy kadagiti tao nga *agtarigagay* iti amin a pusoda nga agtungpal kadagiti bilin, uray no kurang pay ti *kabaelanda nga agtungpal* kadagitoy.

Mabalin nga adda agkuna, “Adda am-ammok a miembro ti Simbaanyo a maysa a hipokrito. Diak pulos makikappeng iti maysa a simbaan nga adda maysa a miembro a kas kenkuana.”

No ti kaipapanan kadakayo ti *hipokrito* ket maysa a tao a saan a naan-anay nga agbibig wenna agtungtungpal iti no ania ti patienna, no kasta hipokritokami amin. Awan uray maysa kadakami ti naan-anay a kas ken ni Cristo nga ammomi a nasken a kasta koma ti pagbalinanmi. Ngem sipapasnek a tartarigagayanmi ti mangatur kadagiti biddutmi ken saankami nga agbasol. Iti puso ken kararuami tarigagayanmi ti agbalin a nasaysayaat babaen ti tulong ti Panubbot ni Jesucristo.

No dagitoy dagiti tartarigagayanyo, no kasta ania man dagiti kasasaadyo, bukodyo a pakasaritaan ti biagyo, wenna pigsa ti pammaneknekyo, adda lugar para kadakayo iti daytoy a Simbaan. Umaykayo makikadua kadakami!

Umaykayo Makikadua Kadakami!

Iti laksid dagiti pagkuranganmi kas tao, mamatiak a makitayonto kadagiti miembro daytoy a Simbaan ti adu kadagiti kasingpetan a kararua ditoy a lubong. Ti Simbaan ni Jesucristo ket mangal-allukoy kadagiti nasingpet, ti manangipateg, ti napudno ken ti nagaget.

No namnamaenyo a makasarakayo kadagiti perpekto a tao ditoy, mapaaykayonto. Ngem no sapulenyoy ti natarnaw a doktrina ni Cristo, ti balikas ti Dios “a mangpaimbag iti nasugat a kararua,”⁹ ken ti pangpasanto nga impluensia ti Espiritu Santo, ditoy ti pakasarakanyo. Iti daytoy a panawen ti panagkapsut ti pammati—iti daytoy a panawen nga adun dagiti makarikna nga adayodan iti Dios—makitayonto ditoy dagiti tao nga agtarigagay a mangammo ken umasideg iti Mangisalakanda babaen ti panagserbi iti Dios ken kadagiti padada a tattao, kas met la kadakayo. Umaykayo makikadua kadakami!

Pumanawkayto Kadi Met?

Naipalagip kaniak ti maysa a panawen iti biag ti Mangisalakanda idi adu ti nangpanaw Kenkuana.¹⁰ Sinaludsod ni Jesus kadagiti sangapulo-ket-dua a disipulona:

“Pumanawkayto kadi met?”

“Kalpasanna insungbat ni Simon Pedro kenkuana, Apo, papananmo ngarud? addaanka kadagiti balikas ti agnanayon a biag.”¹¹

Adda dagiti gundaway a nasken a sungbatantayo ti kasta met la a saludsod Pumanawkayto kadi met? Wenna, datayo kadi, kas ken Pedro, ket nairut a kumpet kadagiti balikas ti agnanayon a biag?

No agsapsapulkayo iti kinapudno, kaipapanan, ken wagas a pakatignayan ti pammatiyo; no agsapsapulkayo iti maysa a lugar a pagyanan: Umaykayo makikadua kadakami!

No tinallikudanyon ti relihion a sigud idi nga inawatyo: Agsublikayo manen. Umaykayo makikadua kadakami!

No masulsulisogkayo nga agsanud: Agtalinaedkayo pay iti nabaybayag bassit. Adda lugar para kadakayo ditoy.

Ipakaasik iti amin a dumdumngeg wenno agbasbasa kadagitoy a balikas: Umaykayo makikadua kadakami. Umaykayo dumngeg iti awag ti

managayat a Cristo. Bagkatenyon ti krusyo ket sumurotkayo Kenkuana.¹²

Umaykayo makikadua kadakami! Gapu ta ditoy ti pakasarakanyonto iti napateg a banag a saan a magatadan ti kuarta.

Paneknekak a ditoy ti pakasarakanyonto kadagiti balikas ti agnanayon a biag, ti kari ti naindaklan a pannaka-subbot, ti dalan nga agturong iti talna ken ragsak.

Sipapasnek nga ikarkaragko a ti bukodyo a panagsapul iti kinapudno ket maimalditto iti pusoyo ti tarigagay nga umay ket makikaduakayo kadakami. Iti sagrado a nagan ni Jesucristo, amen.

DAGITI NAGADAWAN

1. Kitaen iti Mateo 16:18–19; Helaman 10:7.
2. Kitaen iti Doktrina ken Katulagan 84:20.
3. Kitaen iti 2 Nephi 33:10.
4. Kitaen iti “Nagaramidak ‘kad Naimbag?’” *Hymns*, blg. 223.
5. Kitaen iti Pagannurotan ti Pammati 1:11.
6. Panid ti paulo ti Libro ni Mormon; kitaen iti Mormon 8:17.
7. Kitaen iti Hebreo 11:1; Alma 32:21.
8. Kitaen iti F. F. Bosworth, *Christ the Healer* (1924), 23.
9. Jacob 2:8.
10. Kitaen iti Juan 6:66.
11. Juan 6:67–68.
12. Kitaen iti Mateo 16:24.